

Daño acumulativo di mal gobernacion

Skirbi pa: Armand Hessels

Ta difícil pa calcula e daño economico di drispidimento y entrada perdi cu consecuen- cia directo pa e nivel di prosperidad y bienestar di pueblo Rubiano.

Ya caba e gastonan pa motibo di nombramento politico so durante tur e añanan ta difícil di calcula. Pasobra no ta trata solamente di e gastonan directo manera salario, beneficio secundario y gasto adicional cu awendia ta suma na un promedio anual di por lo menos Af. 75.000,- pa empleado. Completamente innecesario e gobiernonan consecutivo a haci gasto enorme pa nombra miles y miles di trahado for di e sector priva den servicio di gobierno. Na su turno, sector priva mester a reemplasa e trahadonan cu gobierno a busca for di su seno, cu otro trahado, hopi biaha for di exterior.

Tanto e productividad reduci di e aparato gubernamental como e gastonan extra pa asunto manera alojamiento, servicio publico manera awa y luz, salubridad publico y enseñansa pa e grupo creciente di stranhero a percura pa gasto grandi adicional pa comunidad. Pa motibo di e gran cantidad di empleado publi-

co y mucha stranhero a crea un falta grandi di oficina di gobierno y scol. Como solucion a huur trailer y local di emergencia na escala grandi. Pa un trailer bieu y local di emergencia simpel, facilmente mester a scupi Af. 5000,- di huur pa luna. A plama filial di mesun departamento riba varios edificio local no tawata eficiente. Asina Departamento di Enseñansa tawatin cuater diferente establecimiento. E huur total mensual tawata monta na Af. 160.000.-. Di e manera aki, e ultimo 25 añanan a drispidi minimal 100 miyon florin pa aña na tur e gastonan di nombramento y promocion politico. E suma aki lo por a hiba e nivel di prosperidad y bienestar di ciudadano na un nivel hopi mas halto si lo a inverti esey na un manera simplemente racional.

Mas drispidimento

Pero...tawatin hopi mas fuente di drispidimento. Tanto Controlaria General como Ministerio Publico den varios ocasion a menciona e forma di procede cuestionabel di destaho. Esaki a percura pa gasto hopi mas halto di locual tawata necesario a base di calculacion estrictamente tecnico comercial. Durante hopi aña varios instancia a muestra cu e gastonan di Cas di

Aruba na Den Haag structural tawata mucho halto. E parke extenso di auto di huur pa empleado publico pa hopi aña tawata un molester grandi pa funcionario cu consciencia di gasto. Mercadeo inefectivo pa sector turistico pa oficina bou di maneho di fanatico di partido y actividad special manera festival di musica a costa un bon suma. Mescos a conta pa 'studieopdracht' cu a permiti funcionario di gobierno pa 'sigui studia', manteniendo nan salario. Un bon relacion cu e partido na mando tawata suficiente pa pasa algun aña den luho na Hulanda riba custodia di comunidad. Como cu bida na Hulanda tawata mas caro, esunnan concerni a haya nan compensacion den Euro. En realidad esey den algun caso por a nifica un aumento di salario di 50%. E gastonan di e 'servicio' aki tawata suma na mas o menos Af. 5 miyon pa aña.

Reorganizacion

Creacion di departamento nobo cu tarea similar na otro ya existente tawata popular cerca e gobiernonan. Asina a evita e problema di 'director no leal' y a traha espacio pa nombra propio partidista. Den gobierno continuamente tawatin un grupo di mas di shen supuesto 'inactivo'. Esakinan tawata



empleado publico cu a suspender for di nan funcion, mayoria di biaha pa motibo politico. Por lo general tawata trata di empleado cu funcion halto cu por a keda sinta tranquilamente na cas mientras nan a sigui ricibi un entrada halto y beneficio secundario excelente. Riba dje e pagado di impuesto mester (a) paga e gastonan halto di un director suplente of de bes en cuando hasta di henter un ekipo di maneho. Segun experto financiero, gobierno facilmente por (a) economisa minimo Af. 100 miyon pa aña si elimina e forman di drispidimento menciona y otronan. Pero esakinan no tawata e unico gastonan grandi cu a pone innecesariamente un presion halto riba financia publico.

Areglo habri AZV

E eronan grandi cu e diferente gobiernonan a comete cu garantia di hotel, e creacion di AZV y e abuso di e fondonan di pensioen APFA y SVB a percura pa un daño di centenares di miyon florin durante e ultimo dos decada y mey. Ya caba solamente pa 1 proyecto di ho-

tel cu a fracasa (esta Sace) e pagado di impuesto mester a scupi casi Af. 200 miyon. Tur aña AZV a costa decenas di miyon di mas pa e forma eroneo cu el a wordo crea: "E sistema ta contene un 'areglo habri' na unda gobierno semper mester cubri e fayonan di e sistema" (Rapport di Universiteit Erasmus na Rotterdam, 'De Arubaanse economie: balanceren op het koord', januari 2005). SVB y APFA casi a bati bancarota pa abuso di e gobiernonan consecutivo y (t) a costa comunidad centenares di miyon adicional pa bira saludabel atrobe.

A base di lo anterior no ta nada exagera pa plantia cu e gasto total cu politica a ocasiona na pueblo di Aruba durante specialmente e ultimo 25 aña di Status Aparte ta suma na varios biyon florin, o sea mas o menos e debe total actual di Aruba. E suma aki ta sigui aumenta pasobra no ta elimina e causa principal (esta nombramento politico), mientras cu e interes gigantesco di Af. 200 miyon anual ta sigui aumenta e debe. □

